




ԱՆԻ ՔԱՂԱՔԻ ՀՈԳԵՎՈՐԱԿԱՆՈՒԹՅՈՒՆԸ*

ՔԱՀԱՆԱՅԱԿԱՆ ՏՈՀՄԵՐ

Անի քաղաքի եկեղեցական կյանքի պատմության մեջ հետաքրքիր էջեր են ներկայացնում նրա քահանայական տոհմերի (տների) մասին պահպանված վկայությունները³⁷: Պարզվում է, որ քաղաքում ոչ միայն եպիսկոպոսական Աթոռն ու մի շարք եկեղեցիներ էին տոհմական, այլև կային քահանայական տներ, որոնց ներկայացուցիչները սերնդե սերունդ սպասավորում էին այս կամ այն եկեղեցում: Այդօրինակ ժառանգականության մասին պահպանված հնագույն վկայությունը 1035 թվականից է: Անիի Ս. Փրկչի եկեղեցին կառուցող Աբղարիբ մարզպանը շինարարական արձանագրության վերջում եկեղեցու ինչքի հափշտակության դեմ ուղղված «անեծքի բանաձևից» հետո ավելացնում է. «... եւ որ **գԳրիգոր իրիցու որդիքս յեկեղեցապանութենէ հանէ**, կրկին անիծիցդ պարտական լիցի, իսկ կատարիչ գրիս՝ արհնեալ լիցի...»³⁸: Այսինքն, Աբղարիբը սահմանում է, որ իր կառուցած եկեղեցու եկեղեցապանությունը պատկանելու է Գրիգոր երեցի որդիներին, նրանց սերնդին:

Նույն Աբղարիբ մարզպանը երկու տարի անց իր մոր՝ Ծուշան Պահլավունու կառուցած Ս. Հակոբ եկեղեցու քահանայությունը «որդոց որդի» հանձնում է Գեորգ երեցին. «... եւ Ապղարիպ մարզպան **եւտու գՍուրբ Յակովբ Գեորգ իրիցու՝ որդեցէ յորդիս...**»³⁹:

* Սկիզբը տես № № ԺԱ—ԺԲ:

³⁷ Քահանայական տոհմերն ընդհանրապես տարածված էին միջնադարյան Հայաստանում: Օրինակ, Մաշտոց Ա կաթողիկոսի մասին ասվում է, թե «սա էր ի տոհմէ քահանայական ի գեղջէն Եղէվարդայ...» (**Գ. Հովսեփյան**, Յիշատակարանք ձեռագրաց, հ. Ա, Անթիլիաս, 1951, էջ 89), իսկ Հովհաննես Սարկավագի մասին նշվում է, որ նա ծագում էր «ի գաւառէն Փառիստայ, ի քահանայական ազգէ» (**Վարդան Արեւելի**, էջ 159):

³⁸ Դիվան..., էջ 46:

³⁹ Նույն տեղում, էջ 49:

1236 թ. Անիի Կաթողիկեին Ավետարան նվիրաբերած Նացուալը հիշատակարանում նշելով եկեղեցու երեք սպասավորներին՝ Դասապետ, Գերսամ քահանաներին և Սարգիս սարկավագին, շեշտում է, որ մատյանը տվել է նրանց «որդիցէ յորդիք»⁴⁰, որից կարելի է ենթադրել, թե վերջիններս ազգականներ էին, և այստեղ նույնպես գործ ունենք քահանայական տան հետ:

Հետաքրքիր են ԺԲ դարի նշանավոր պատմագիր, Անիի Կաթողիկեի ավագերեց Սամուել Անեցու ժառանգների մասին պահպանված վկայությունները: 1233 թ. նրա թողը՝ Աբրահամ երեցը, նվիրատվություն է կատարել Խծկոնքի վանքին: Արձանագրության մեջ նա հիշում է հորը՝ Սարկավագ քահանային, և համբավավոր պապին, վերջինիս հիշատակին նվիրելով կատարած նվիրատվության դիմաց ստացած վեց պատարագներից երկուսը: Ահա այդ արձանագրությունից մի հատված. «Ի ՈԶԲ (1233) թուիս շնորհին Քրիստոսի, ես **Աբրահամ երեց, որդի Սարկավագ քահանայի, թողն Սամուել երիցոյ Անեցի** ետու զիմ գանձագին Բ (2) տուն նորաշէն եւ ի վերէն Բ (2) կողպակ ի Սուրբ Ուխտս ի Խծկանս... եւ փոխարէն հատուցէն մեզ յամենայն ամի Զ (6) 'աւր պատարագ' Դ (4) Աբրահամու եւ Բ (2) տէր պապ երիցոյ...»⁴¹: Արձանագրության շնորհիվ մեզ հայտնի է դառնում, որ Սամուել Անեցու քահանա որդին Սարկավագ անունն է կրել: Տեղին է հիշել, որ Անեցին ժամանակին աշակերտել է մեծ ուսուցչապետ Հովհաննես Սարկավագին, որից հետո բնական պետք է լինի ենթադրությունը, թե Սամուելը որդուն Սարկավագ է անվանակոչել ի պատիվ սիրելի ուսուցչի:

Միանգամայն հնարավոր է, որ Սամուելի որդի Սարկավագն է 1151 թ. նորոգել Անիի Ս. Սարգիս եկեղեցին, որը գրականության մեջ երբեմն կոչվում է նաև Սարկավագի եկեղեցի: Պահպանված արձանագրությունը վկայում է. «Ի թուին Ո (1151) ես Սարկավագ քահանա զայս ծերացեալ տաճարս Սըրբոյն Սարգսի վերըստին նորոգեցի ի հըմանէ ի յիմոց գուց. Որք ի ներկայդ էք զիս եւ ծնադս յիշեսցիք ի Քրիստոս Յիսուս»⁴²: Սույն արձանագրությունը Անիի Եկեղադրան տիրապետության շրջանից հայտնի առաջին շինարարական վկայագիրն է: Հիշենք, որ այդ ժամանակ եկեղեցաշինության համար բնավ էլ նպաստավոր պայմաններ չէին և նման գործ կարող էր կատարել միայն քաղաքում ամուր դիրք ու հեռադան ունեցող մեկը: Սամուել Անեցին, որը նույն այդ տարիներին Մայր տաճարի ավագերեցն էր, անմիջական կապեր ուներ ժամանակի հայոց կաթողիկոսի՝ Գրիգոր Գ Պահլավունու հետ, որի պատվերով էր գրում իր «Ժամանակագրությունը» և հետևաբար, բավական ճանաչված անձնավորություն էր, կարող էր իր որդի Սարկավագի ձեռնարկի երաշխավորը հանդիսանալ, նրան նաև օժանդակելով նյութապես ու բարոյապես: Սարկավագի արձանագրության վերջաբանը ևս ասես հուշում է այս իրողության մասին: Այն ոչ թե ուղղված է հետագա սերունդներին, այլ «ծերացյալ» տաճարը հիմնովին նորոգված տեսնելու եկած ներկաներին՝ «Որք ի ներկայդ էք զիս եւ ծնադս յիշեսցիք...»:

Սամուելի թոռ և Սարկավագի որդի Աբրահամ երեցից հետո այս քահանայական տոհմը շարունակվել է թե ոչ, հայտնի չէ: Խծկոնքի 1233 թ.

⁴⁰ ԺԳ դարի հիշատակարաններ, էջ 198:

⁴¹ Ն. Սարգիսյան, նշվ. աշխ., էջ 211:

⁴² Դիվան..., էջ 56:

արձանագրության մեջ Աբրահամը հիշատակում է իր մի քանի ազգականներին (Խոցադեղին, Հովհաննես երեցին, Տիրանցին, Շահմամին), որոնք արդեն մահացել էին և թաղվել վանքի Ս. Սարգիս եկեղեցու մոտ⁴³: Ինչևէ, Անեցի մատենագրի տոհմի երեք սերնդի մասին պահպանված վկայությունն արդեն իսկ ուշագրավ իրողություն է (այս առումով Սամուել Անեցին հայ միջնադարյան պատմիչներից թերևս ամենաբախտավորն է):

Մեկ այլ քահանայական տան մասին տեղեկություն է պահպանվել Անիի Ս. Փրկչի եկեղեցու 1193 թ. արձանագրության մեջ: Շեղդադյանների տիրապետության վերջին շրջանում, երբ քաղաքի հայ բնակչությունն ավելի մեծ ինքնուրույնություն ուներ, վերականգնվում էին եկեղեցիներ, կառուցվում ժամատներ, կանգնեցվում խաչքարեր: Այս ժամանակ է, որ Տրդատ քահանան ու նրա կին Խուշուշը տեր են դառնում Աբղղարիք մարզպանի կառուցած Ս. Փրկչի եկեղեցուն, արձանագրության մեջ այն անվանելով՝ «զմեր գանձագին հայրենիք»⁴⁴: Նրանք նորոգում են եկեղեցին, կառուցում ժամատուն, տալիս բազմաթիվ ընծաներ: Արձանագրության սկզբում Տրդատը նշում է իր քահանա նախնիներին, գրելով. «...Արդ ես **Տրդատ քահանա, որդի Սուրենես քահանաի, թոռն Գեորգա՝ առաքելիցն Արմոյ...**»⁴⁵: Դժվար է որոշել, Տրդատի պապ Գեորգը արուճեցի՞ էր, թե՞ անեցի: Ինչպես երևում է ամուսինների՝ Ս. Փրկչին տված անշարժ գույքի թվարկումից, նրանց «հայերենի ժառանգությունը» գտնվում էր Արուճում⁴⁶: Տրդատի հոր՝ Սուրենես քահանայի մասին այլ տեղեկություններ չկան: Անիի շրջանին վերագրվող ԺԲ դարի վերջերի մի ձեռագրի (Մատենադարան, № 7635) խորաններից մեկում պահպանվել է «Զմեղապարտ եւ անարժան գրիչ Սուրենես յիշեալիք ի Տէր»⁴⁷ հիշատակարանը, իսկ 1219-ին Սուրենես անունով միաբան է հիշվում Հատինում⁴⁸, բայց դժվար է ասել, թե սրանք կապ ունեն Տրդատի հետ:

Ս. Փրկչի արձանագրության մեջ երբ նշվում են Տրդատին ու կնոջը հատկացվելիք պատարագները, հիշվում է նաև Սարգսիկ անունով մեկը՝ Սողոմոնի որդին («...պարտին ժառանգորդք զկնի մեր կատարել ամենայն ամի Խ (40) մի Ի (20) Տրդատա, Ի (20) տիկին Խուշուշին եւ Բ (2) Սարգսկանն, որդո Սողոմոնի անխափան կատարել») ⁴⁹: Վերջինս հավանորեն ազգակցական կապ ուներ Տրդատի հետ (հնարավոր է, որ Սողոմոնն ու Սուրենեսը եղբայրներ էին):

⁴³ Ն. Սարգիսյան, նշվ. աշխ., էջ 211: Անիի Կաթողիկեի 1286 թ. մի արձանագրության մեջ հիշվում է եկեղեցու առաջնորդ Սարկավագը (Դիվան..., էջ 36): Որևէ փաստական հիմք չունենք այս Սարկավագին Սամուելի տոհմի հետ առնչելու համար: Սակայն, տեսականորեն չի բացառվում, որ նա իր անունը ստացած լինի պապի կամ ապուսպապի անունից, որպիսին կարող էր լինել նաև Սամուելի որդի Սարկավագը:

⁴⁴ Դիվան..., էջ 47:

⁴⁵ Դիվան..., էջ 47:

⁴⁶ «...Ես Տրդատ երեց եւ լծակից իմ Խուշուշս ի մեր հայրենի ժառանգութեանց ի սպաս պիտոյից հացի եւ գինոյ տուաք չորս այգի յԱրուճ՝ զՍաղար, եւ զԸլիկ եւ զԿովարածն եւ Բլար Խաչկայն եւ տուն եկեղեցոյն դիմաց. մեծ արտ Բելսենցն...» (Դիվան..., էջ 47): Արուճն այդ շրջանում բարգավաճ ավան էր, որը սերտ կապեր ուներ Անիի հետ (Վ. Մաթևոսյան, Արուճ, Երևան, 1987, էջ 28—35):

⁴⁷ ԺԳ դարի հիշատակարաններ, էջ 252:

⁴⁸ Նույն տեղում, էջ 114:

⁴⁹ Դիվան..., էջ 47:

Անիի քահանայական երկու ընտանիքի հանդիպում ենք քաղաքի ԺԴ դարի գաղթականության այն հատվածի մեջ, որը հաստատվել էր Պարսկաստանի նորաշեն Սուլթանիա քաղաքում: Այս տների առավել հայտնի ներկայացուցիչներն էին նշանավոր գրիչ, ծաղկող, կազմարար Մխիթար Անեցին և նրա հոգևոր հայրը՝ գրասեր Գրիգոր քահանան: Մխիթարը, որը մի շարք ձեռագրեր է ընդօրինակել Սուլթանիայում, 1334 թ. Ավետարանի (Երուսաղեմ, № 1941) հիշատակարանում նշում է, որ իրեն հորդորել են գործը սկսել նկարիչ Ավագը և Գրիգոր Անեցին («... եւ բազմերախտ հոգեւոր հայրն մեր, ստոյգ քարտուղարն եւ անհաս ընթերցողն՝ Գրիգոր երէց Անեցի»)⁵⁰: Այնուհետև Մխիթարը հիշատակում է իր ընտանիքի անդամներին՝ «... յիշել աղաչեմ... զՄխիթար մեղօք մեռեալ ոգի, անարժան գծող սորին... նաեւ զԾնողսն իմ ըստ մարմնոյ, զհայրն իմ՝ զտէր Յակոբ քահանայ եւ զմայրն իմ՝ զՍեդա խաթուն եւ զհարազատ եղբարսն իմ՝ զԳրիգոր քահանայ եւ զԳէորգ քահանայ եւ զքոյրն իմ՝ զԶալալն...»⁵¹:

Այսպիսով, պարզվում է, որ անեցի Հակոբ քահանան ունեցել է երեք քահանա որդի՝ Գրիգոր, Գէորգ, Մխիթար: 1338 թ. ընդօրինակած Աստվածաշնչի (Մատենադարան, № 4429) չափածո հիշատակարանում Մխիթարը դարձյալ հիշատակում է իր ազգականներին, բայց նաև նշելով, որ նրանք արդեն մահացել են.

«Յիշեմ զգաւառն իմ հայրենին,
 Զմայրաքաղաք ամուրն Անին,
 Եւ ըստ մարմնոյ իմ ծնողին՝
 Տէր Յակոբա եւ Սեդային,
 Եւ իմ եղբարցն հարազատին՝
 Գէորգա եւ Գրիգորին,
 Նայ և քվերն իմ՝ Զալալին,
 Որք են ննջեալ ի տապանին...»⁵²:

Այս հիշատակարանում Մխիթարն առանձնակի ընդգծում է ավագ եղբորը, որպես իր ուսուցչի

(«... Երէց եղբօրն իմ Գէորգին,
 Ըզկնի իմ շատ աշխատողին
 Եւ առաջին իմ ուսուցչին...»)⁵³:

Անեցի գրիչը չի մոռանում նաև իր համերկրացուն՝ Գրիգոր Անեցուն, ու նրա որդի Պարոնին, որը հավանաբար իր երիտասարդ տարիների ընկերն է եղել.

⁵⁰ Ն. Պողարեան, Մայր ցուցակ ձեռագրաց Սրբոց Յակոբեանց, հ. 2, Երուսաղեմ, 1972, էջ 484: Ձեռագրի վերջում գրած հիշատակարանում Մխիթարը Գրիգորին կոչում է իր ուսուցիչն ու խրատատուն՝ «յիշեսցիք... զբազմերախտսն մեր, զուսուցիչսն մեր եւ զկարատիչսն, զհոգեւոր հայրն մեր զԳրիգոր քահանայ Անեցի եւ ...զԱվագ...»: Գրիչը հիշում է նաև իր մեկ այլ ուսուցչին՝ «Ծան Յակոբ քահանային» (Նույն տեղում):

⁵¹ Նույն տեղում:

⁵² ԺԴ դարի հայերեն ձեռագրերի հիշատակարաններ (կազմ. Լ. Խաչիկյան), Երևան, 1950, էջ 310:

⁵³ ԺԴ դարի հիշատակարաններ, էջ 310:

(«Մեղաորիս գաւառակցին՝
Գրիգորու քահանային,
Սընընդակցին իմ՝ Պարոնին»)՝⁵⁴:

Ինչպէս պարզվում է այլ հիշատակարաններից, Գրիգոր Անեցին ևս քահանայի զավակ էր, ուներ քահանա եղբայր և որդի: 1326 թ. նա Սուլթանիայում Կարապետ գրչին պատվիրել է ընդօրինակել Իգնատիոսի՝ Ղուկասի ավետարանի մեկնությունը (Երուսաղեմ, № 453), որի հիշատակարանում նշվում են նրա ազգականները, ինչպէս նաև Մխիթար Անեցին. «Աւրինեացէ Քրիստոս Աստուած ստացող սուրբ գրոցս **գԳրիգոր քահանայ եւ զհայրն իր զԵփրեմ քահանայ եւ զմայր իր զԱւագ տիկին եւ զեղբայրն իր Սարգիս քահանայ եւ զամուսին իր Տիկնանցն եւ զանդրանիկ որդին իր Մխիթար, զփոխեալն ի Քրիստոս, եւ զսրբասնեալ շառաւիղն լուսոյ եւ զժառանգն արհմութեան զորդեակն իր զՊարոն, զոր Տէր Աստուած ընդ երկայնատրս արացէ: Նա եւ զհոգեւոր եղբայրն մեր՝ **զՄխիթար Անեցի՝** զերախտաւորն մեր...»⁵⁵:**

Նույն հիշատակարանում Կարապետ գրիչը, անկասկած ստացողի պահանջով, նշում է նրա Անիից գաղթելու ու Սուլթանիս գալու պատճառը՝ «Եւ ունէր սա զբնակութիւնս իր ի մեծ մայրաքաղաքն Անի: Արդ, վասն աներման աշխարհին իրեանց, եւս առաւել՝ վասն մայրաքաղաքին Անոյ, եկեալ բնակէր ի տեղիս յայս...»⁵⁶: Գրասեր Գրիգոր Անեցին 1341 թ. նույն Կարապետ գրչին Սուլթանիայում պատվիրել է մի Աստվածաշունչ (Վեներտիկ, № 935/8) և այն ստանալով նվիրել որդուն՝ Եփրեմ քահանային: Ինչպէս երևում է, իր այս՝ թերևս կրտսեր որդուն Գրիգորը կոչել է հոր անվամբ: Հիշատակարանում նշվում է, որ Գրիգորը ձեռագիրը ստացել է «ի ժառանգութիւն զաւակի իւրոյ՝ պատուական քահանային Եփրեմի»⁵⁷, իսկ վերջինս 1354-ին մատչանը նվիրել է Վարագավանքին, թողնելով համապատասխան հիշատակարան՝ «ես նուստ Եփրեմ քահանայ, որ ունէի զգիրքս Աստուածաշունչ ի Հօրէ իմմէ ի Գրիգոր քահանայէ, նուիրեցի և ետու զսա ոխտիս Վարագայ Սուրբ Նշանին...»⁵⁸:

Այսպիսով, բերված հիշատակարանները մեզ ծանոթացնում են Անիի հոգևորականության տարագիր մի հատվածի ներկայացուցիչներին, որոնք քա-

⁵⁴ Նույն տեղում, էջ 309: Հիշատակարանների ժողովածուում Պարոնի անունը գրված է փոքրատառով, մինչդեռ ինչպէս երևում է Գրիգոր Անեցու 1326 թ. հիշատակարանից, վերջինիս որդու անունը Պարոն էր և Մխիթար Անեցին անկասկած հենց նրան նկատի ունի: Նույն հիշատակարանում Մխիթարը նշում է իր չորս աշակերտներին՝ Արասբուդին, Թաթոսին, Սայինքեկին, Գրիգորին:

⁵⁵ Ն. Պողարյան, Մայր ցուցակ ձեռագրաց Սրբոց Յակոբեանց, հ. Բ, Երուսաղեմ, 1967, էջ 420: Այս ձեռագրին անդրադարձած Ա. Մարտիրոսյանը գրիչ Կարապետին չգիտես ինչու կոչում է վարդապետ և ենթադրում, թե նա էլ էր անեցի (А. Мартиросян, Армянские поселения на территории Ирана в XI—XV вв. Ереван, 1990, с. 201) Մինչդեռ հիշատակարանում Կարապետն ընդհանրապես չի հայտնում իր հոգևոր կոչումը և ոչ մի ակնարկ չի անում, թե ինքը Գրիգորի համերկրացին է:

⁵⁶ Ն. Պողարյան, Ցուցակ... հ. Բ, էջ 420:

⁵⁷ ԺԴ դարի հիշատակարաններ, էջ 328: Հիշատակարանում մեծ գովեստով է խոսվում Գրիգորի մասին՝ «...վեհիմաստ քահանայն Աստուծոյ Գրիգոր, որ և ինքն իսկ ունէր զշնորհս վարդապետութեան՝ զօրեղ բանի լեզուաց և վկայութեամբ Սրբոց Գրոց, և լիպէս զարդարեալ առաքինութեամբ և իմաստութեամբ...»:

⁵⁸ Նույն տեղում, էջ 328, 406:

ղաքացիներից շատերի պես հարկադրված էին թողնել հայրենի քաղաքը: Հատկանշական է, որ անեցիները գաղթել են տոհմերով, ընտանիքներով, և դրանց մեջ եղել են նաև քահանայական տներ:

Անի քաղաքի հոգևորականության վերաբերյալ կարելի է բազմաթիվ այլ տեղեկություններ վկայակոչել, մասնավորապես անդրադառնալ հոգևորականության թողած ծանրակշիռ մշակութային ավանդին և այլն, սակայն առայժմ բավարարվենք վերը ասվածով և վերջում ներկայացնենք Անի քաղաքի ու նրա մերձակա Հոռոմոս, Բագնայր, Արջո Առին վանքերի հոգևորականության համահավաք անվանացանկը: Յուրաքանչյուր անվանը կից բերում ենք համառոտ տեղեկություններ, սկզբնաղբյուրը չենք նշում, քանի որ ցանկության դեպքում այն գտնելը դյուրին է (եթե նշվում է, որ անունը արձանագրության մեջ է հիշվում, այն կարելի է գտնել արձանագրությունների ժողովածուից, եթե հիշատակարանից է՝ համապատասխան ժողովածուից՝ ըստ թվականի, կամ էլ նշվում է հիշատակող պատմիչի անունը և այլն):

ԱՆԻ ՔԱՂԱՔԻ ԵՎ ՄԵՐՋԱԿԱ ՎԱՆՔԵՐԻ ՀՈԳԵՎՈՐԱԿԱՆՈՒԹՅԱՆ

Ա Ն Վ Ա Ն Ա Ց Ա Ն Կ

ԱԲԱՍ—եպիսկոպոս Խժկոնքի, հիշվում է վանքի 1233 և 1240 թթ. արձանագրություններում, նաև 1236 թ. Խժկոնքին նվիրաբերված մի Ավետարանի հիշատակարանում (Նոր Զուղա, Ամենափրկիչ վանք, № 36): Նույն ձեռագրում հիշատակարան է գրվել նրա ու մյուս միաբանների անունից:

ԱԲԴԱՄԵՆ—Հիշվում է Խժկոնքի 1213 թ. մի արձանագրության մեջ. «Աբդմսեն կրանականս....»:

ԱԲԻՍՈՂՈՄ—անեցի վարդապետ, քաղաքի պալատական եկեղեցու երկու արձանագրություններում իրեն կոչում է կառուցող՝ «ես Աբիսողոմ վարդապետ շինեցի զեկեղեցիս...»:

ԱԲՐԱՀԱՄ—Բագնայրի վանահայր, հիշվում է վանքի 1262, 1266 թթ. և մի քանի անթվական արձանագրությունների մեջ:

ԱԲՐԱՀԱՄ—անեցի երեց, որդի Սարկավագ քահանայի, թոռ՝ Սամուել Անեցու: 1233 թ. Անիում գտնվող տուն ու կուղպակ է նվիրել Խժկոնքին:

ԱՆԱՆԷ—Պետրոս Գետադարձի քրոջ որդին, սպասավորել է Անիի կաթողիկոսարանում:

ԱՆԱՆԻԱ—Հոռոմոսի վանահայր, 1013 թ. արձանագրության մեջ նշում է Գագիկ Ա-ի օժանդակությամբ իր կատարած գործերը:

ԱՆԴՐԵԱՍ—վարդապետ, Խժկոնքի միաբան, հիշվում է վանքի 1208 թ. մի արձանագրության մեջ:

ԱՆԴՐԵԱՍ—Արջո Առինի վանահայր, հիշվում է 1289 թ. Որդեկ (Որդյակ) երեց Կողբացու նվիրատվական արձանագրության մեջ:

ԱՆԴՐԵԱՍ—Հոռոմոսի վանահայր, վարդապետ: Հիշվում է Անիի եպիսկոպոս Գրիգոր Ա-ի և Խուրթու խաթունի նվիրատվական արձանագրություններում (ԺԳ դարի 10-ական թթ.):

ԱՌԱՔԵԼ—անեցի վարդապետ (մականունը՝ Վատ), 1222 թ. Անիի մերձակա Մաղապերդում Մխիթարի և Շերանի գործակցությամբ արարե-

րենից հայերեն է թարգմանել մի Երազահան: Ենթադրվում է, որ թարգմանել է նաև այլ գործեր:

ԱՌԱՔԵԼ—անեցի վարդապետ, հիշվում է 1160 թ. Աբրահամի կառուցած բուրգի արձանագրության մեջ՝ «... եւ զԱռաքել վարդապետ յաղաւթս յիշեաշիք»:

ԱՌԱՔԵԼ—քահանա, նահատակվել է 1208 թ. Կեչրորում, հիշվում է եղբոր՝ Խճկոնքում կանգնեցված մահարձան-խաչքարի արձանագրության մեջ:

ԱՍՏՎԱԾԱՏՈՒՐ—Արջո Առինի վանքի քահանա, ուսանել է նույն վանքում, 1236—37 թթ. մի Ավետարան է նվիրել վանքին: Որդու անունն է «Մանուիլ»:

ԱՎԵՏԻՍ—ծնունդով անեցի, վարդապետ, Սանահինի վանահայր, հիշվում է այդ վանքի մի քանի արձանագրություններում: 1250 թ. նվիրատվություն է կատարել Հոռոմոսին («ես Աւետիս վարդապետ... ազգաւ ի մայրաքաղաքէս Անո...»):

ԱՎԵՏԻՔ—եպիսկոպոս, Հոռոմոսի վանահայր, հիշվում է վանքի 1751 թ. մի արձանագրության մեջ:

ԲԱՐՍԵՂ Ա ԱՆԵՅԻ—(որդի Վասակ իշխանի) 1072 թվականից Անիի և Ծիրակի եպիսկոպոս, 1081-ից՝ աթոռակից կաթողիկոս, 1105-ից՝ Ամենայն հայոց կաթողիկոս, մահացել է 1113 թ.:

ԲԱՐՍԵՂ Բ ԱՆԵՅԻ—(որդի Հասան Մագիստրոսի) Անիի և Ծիրակի արքեպիսկոպոս, 1195-ից՝ կաթողիկոս: Հիշվում է բազմաթիվ սկզբնաղբյուրներում 1160—1199 թթ.:

ԲԱՐՍԵՂ Գ—(որդի Ամիր Երկաթի) Անիի արքեպիսկոպոս և Հոռոմոսի վանահայր, հիշվում է Հոռոմոսի 1229—53 թթ. բազմաթիվ արձանագրություններում, 1239-ին՝ Անիում (որպես արքեպիսկոպոս):

ԲԱՐՍԵՂ ԲԱՇԽԱՏԵՅԻ—Սպասավորել է Անիի կաթողիկոսարանում ԺԱ դարի առաջին կեսին (ըստ Մատթեոս Ուոհայեցու):

ԲԱՐՍԵՂ—Գրիգոր Մագիստրոսի աշակերտներից, որին եղբոր՝ Եղիսեի հետ ուղարկել է Անի Պետրոս Գետադարձի մոտ ուսանելու և կաթողիկոսարանում սպասավորելու համար:

ԲՈՒԼԽԱՐ—Անիի կաթողիկոսարանի վարդապետ ԺԱ դարի առաջին կեսին (Մատթեոս Ուոհայեցի):

ԳԱՄԱՂԻԵԼ—Բագնայրի վանքի միաբան, վարդապետ, հիշվում է վանքի ԺԳ դարի մի արձանագրության մեջ:

«ԳԱՆՁԱԿԵՅԻ»—միայնակյաց (անունը չի պահպանվել), 55 տարի ճգնափորական կյանք վարելուց հետո, եկել է Անի և որոշ ժամանակ անց այստեղ մահացել ու թաղվել: Նրա գերեզմանն անեցիների շրջանում ուխտավայր է դարձել (ԺԳ դար): Հիշվում է Ս. Առաքելոց եկեղեցու մի արձանագրության մեջ:

ԳԵՐՍԱՄ—Անիի Մայր՝ տաճարի քահանա, հիշվում է 1236 թ. Նացուալի՝ եկեղեցուն նվիրած ձեռագրի հիշատակարանում:

ԳԵՐՍԱՄ—Արջո Առինի վանքի միաբան (ԺԳ դարի սկիզբ), հիշվում է Գրիգոր Ա եպիսկոպոսի արձանագրության մեջ:

ԳԷՈՐԳ—անեցի երեց, հիշվում է Աբղարիբ մարզպանի 1037 թ. արձանա-

- գրության մեջ: Նրան և նրա ժառանգներին է հանձնվել Անիի Ս. Հակոբ (Ծուշան Պահլավունու) եկեղեցու սպասավորության գործը:
- ԳԷՈՐԳ—Հոռոմոսի միաբան (վանահորից հետո երկրորդ մարդը), հիշվում է Հովհաննես Սմբատ թագավորի 1036 թ. արձանագրության մեջ:
- ԳԷՈՐԳ—«Ջուլհակորդի», Անիի կաթողիկոսարանի սպասավոր ԺԱ. դարի առաջին կեսին (Մատթեոս Ուոհայեցի):
- ԳԷՈՐԳ—գրիչ, կազմարար, Անիի կաթողիկոսարանի սպասավորներից: 1046 թ. ձեռագիր է ընդօրինակել Պետրոս Գետադարչի պատվերով, գրել ընդարձակ հիշատակարան, որի մի մասը՝ ստացողի անունից:
- ԳԷՈՐԳ—Հոռոմոսի միաբան, երեց (հավանաբար ծնունդով Անիից, քաղաքում գտնվող իր հայրենի տները կտակել է վանքին), «...Գեորգ ծեր երեց...» (ԺԳ դար):
- ԳԷՈՐԳ—վարդապետ, 1278 թ. Բագնայրում ստացել է մի ձեռագիր և գրել հիշատակարան:
- ԳԷՈՐԳ—անեցի քահանա, Հակոբ քահանայի որդին: Հիշվում է եղբոր՝ Մխիթար Անեցու 1334 և 1338 թթ. հիշատակարաններում:
- ԳՅՈՒՏԻԿ—«կրոնավոր», Հոռոմոսի վանքին է նվիրել Անիում գտնվող իր հայրենի տունը (ԺԳ դար):
- ԳՈՐԳ—անեցի քահանա, հիշվում է Անիում, մի արձանագրության բեկորի վրա:
- ԳՐԻԳՈՐ Ա (Մագիստրոս)—Անիի և Ծիրակի արքեպիսկոպոս, Արուղամի որդի: Հիշվում է 1213—1233թթ.:
- ԳՐԻԳՈՐ Բ—Անիի եպիսկոպոս, հիշվում է 1277 թ.:
- ԳՐԻԳՈՐ—անեցի երեց, որի որդիներին է հանձնվել քաղաքի Ս. Փրկչի եկեղեցու եկեղեցապանությունը: Հիշվում է 1035 թ.:
- ԳՐԻԳՈՐ—անեցի քահանա, քաղաքի «Ծախմատային» կոչված եկեղեցու ավագերեցը (ԺԱ դար):
- ԳՐԻԳՈՐ—Անիի վարդապետարանում աշակերտել է Հովհաննես Սարկավագին, եղել Սամուել Անեցու դասընկերը, որը և հիշում է նրան (ԺԱ դարի վերջ—ԺԲ դարի սկիզբ):
- ԳՐԻԳՈՐ—Անիի Մայր տաճարի ավագերեց (նույնը նախորդի հետ), 1128 թ. քաղաքի Փատլուն ամիրան փորձել է ճնշում գործադրել նրա վրա, բայց արդյունքի չի հասել:
- ԳՐԻԳՈՐ—Արջո Առինի վանահայր, վարդապետ: Հիշվում է Գրիգոր Ա եպիսկոպոսի կանոնադրական արձանագրության մեջ (ԺԳ դարի սկիզբ):
- ԳՐԻԳՈՐ—Խժկոնքի վանքի միաբան, հիշվում է 1236 թ. վանքին նվիրաբերված Ավետարանի հիշատակարանում:
- ԳՐԻԳՈՐ—քահանա, 1258 թ. Մկրտիչ արեղայի հետ նորոգել է Հոռոմոսի՝ Արունում և Փարպիում գտնվող հնձանները:
- ԳՐԻԳՈՐ—անեցի քահանա, 1292 թ. Անիում ապաստան է տվել Երզնկայից այստեղ եկած Ահարոն վարդապետին (հիշվում է վերջինիս հիշատակարանում):
- ԳՐԻԳՈՐ—անեցի քահանա, Հակոբ քահանայի որդին: Հիշվում է եղբոր՝ Մխիթար Անեցու 1334 և 1338 թթ. հիշատակարաններում:
- ԳՐԻԳՈՐ—անեցի քահանա, քաղաքի Ս. Աստվածածին (Խամբուշենց) եկեղեցու սպասավոր, հիշվում է մի անթվական արձանագրության մեջ:
- ԳՐԻԳՈՐ—անեցի քահանա, Եփրեմ քահանայի որդին, 1326 թ. ձեռագիր է

ստացել Սուլթանիայում (Երուսաղեմ, № 453), ուր գաղթել էր Անիից: 1334 թ. նրան հիշում է նաև Մխիթար Անեցին:

ԳՐԻԳՈՐ—Հոռոմոսի վանքի առաջնորդ, եպիսկոպոս, հիշվում է 1485 թ. Սարգիս Գ կաթողիկոսի հիշատակարանում:

ԳՐԻԳՈՐ—Հոռոմոսի միաբան, արեղա (Ակնագյուղեցի) 1782 թ. այստեղ մի ձեռագիր է ընդօրինակել (Երուսաղեմ, № 2025):

ԳՐԻԳՈՐ—Հոռոմոսի վանահայր, 1868—71 թթ. վանքում նորոգման աշխատանքներ է կատարել:

ԳՐԻԳՈՐԻՍ—Հոռոմոսի վանահայր, հիշվում է 1218 թ. մի նվիրատվական արձանագրության մեջ:

ԴԱՆԻԵԼ—վարդապետ Տիգրանակերտցի. 1685 թ. վերականգնել է լքված Հոռոմոսի վանքը:

ԴԱՍԱՊԵՏ—Անիի Մայր տաճարի քահանա, հիշվում է 1236 թ. եկեղեցուն նվիրաբերված Ավետարանի հիշատակարանում (անունը երկրորդ անգամ նշվում է «Դասական» ձևով):

ԴԱՎԻԹ—Անիի քաղկեդոնական համայնքի եպիսկոպոսը ԺԳ դարի սկզբին: 1223 թ. Վրաց թագավորության կողմից որպես պատվիրակ ուղարկվել է Հոռոմի պապի մոտ:

ԴԱՎԻԹ—քահանա, հիշվում է Հոռոմոսի 1305 թ. արձանագրություններից մեկում («տէր Դաւիթ»):

ԵՂԲԱՅՐԻԿ—Անիի Բեխենց վանքի վանահայր, հիշվում է 1211 թ. «Հաղթանի Ավետարանում», Բեխենց գրչատան մեկ այլ ձեռագրում (ՄՄ, № № 6288, 5554), ինչպես նաև Անիի բուրգերից մեկի 1222 թ. արձանագրության մեջ:

ԵՂԲԱՅՐԻԿ—անեցի արեղա, 1298 թ. քաղաքի ներքին բերդում մի Ավետարան է ընդօրինակել Հակոբ քահանայի պատվերով (Ս. Պետերբուրգ, Արևելագիտության ինստիտուտ, В 44):

ԵՂԻՍԵ—Գրիգոր Մագիստրոսի աշակերտներից, որին եղբոր՝ Բարսեղի հետ ուղարկել է Անի Պետրոս Գետադարձի մոտ ուսանելու և կաթողիկոսարանում սպասավորելու համար: Հետագայում դարձել է Սեբաստիայի եպիսկոպոս:

ԵՆՈՔ (ՅԵՆՈՎՔ)—Անիի կաթողիկոսարանի վարդապետ ԺԱ դարի առաջին կեսին (Սրիստակես Լաստիվերցի):

ԵՓՐԵՄ—Անիի կաթողիկոսարանի քահանա ԺԱ դարի առաջին կեսին (Մատթեոս Ոռհայեցի):

ԵՓՐԵՄ—անեցի քահանա, որը ԺԴ դարի սկզբներին գաղթել է Սուլթանիա: Հիշվում է որդու՝ Գրիգորի 1326 թ. ստացած ձեռագրի հիշատակարանում:

ԵՓՐԵՄ—քահանա, նախորդ Եփրեմի թոռը, Գրիգոր քահանայի որդին: Հորից 1341 թ. մի Աստվածաշունչ է նվեր ստացել, որը հետագայում ընծայել է Վարազավանքին:

ԹԱԴԷՈՍ—Անիի կաթողիկոսարանի սպասավորներից, «որ է անպարտելի գրչութեամբ» (ԺԱ դարի առաջին կեսին), (Մատթեոս Ոռհայեցի):

ԹՈՐՈՍ—անեցի գրիչ, քաղաքում Ավետարան է ընդօրինակել 1379 թ.:

ԻԳՆԱՏԻՈՍ—Հոռոմոսի վանքի միաբան, հմուտ գրիչ և մանրանկարիչ։ Ունեցել է Քրիստոսատուր և Խաչատուր անուններով գործընկերներ և Հովսեփ անունով աշակերտ։

ԽԱԶԱՏՈՒՐ—Անիի կաթողիկոսարանի «դպրապետ» ԺԱ դարի առաջին կեսին (Մատթեոս Ուռհայեցի)։

ԽԱԶԱՏՈՒՐ—Հոռոմոսի վանահայր, հիշվում է 1174 թ. մի նվիրատվական արձանագրության մեջ և 1181 թ. Հովհաննես գրչի հիշատակարանում։

ԽԱԶԱՏՈՒՐ—Անիի վարդապետարանում աշակերտել է Հովհաննես Սարկավագին, եղել Սամուել Անեցու դասընկերը, որը և հիշում է նրան (ԺԱ դարի վերջ—ԺԲ դարի սկիզբ)։

ԽԱԶԱՏՈՒՐ—անեցի քահանա, հիշվում է 1212 թ. Ս. Առաքելոց եկեղեցու մի արձանագրության մեջ։

ԽԱԶԱՏՈՒՐ—Անիի Բեխենց վանքի միաբան, հիշվում է ԺԳ դարի սկզբներին այստեղ գրված Ավետարանի հիշատակարանում (ՄՄ № 5554)։

ԽԱԶԻԿ Բ ԱՆԵՑԻ—Ամենայն Հայոց կաթողիկոս՝ 1058—1065 թթ.։

ԽԱԶԻԿ—երեց, Հոռոմոսի վանքի նվիրատու, ըստ պահպանված արձանագրության (հավանաբար ԺԳ դար)։

ԽԱԶՈՒՏ—անեցի քահանա, հիշատակային բնույթի արձանագրություն է թողել Անիի Ս. Գրիգոր (Բախտաղեկի, կամ Խաչուտի) եկեղեցու բեմի զարդանալերի վրա (ԺԳ դար)։

ԿԱՐԱՊԵՏ—Հոռոմոսի վանքի միաբան՝ հոգևոր տեսուչ։ Հիշվում է 1181 թ. Հովհաննես գրչի հիշատակարանում («... ի հոգևոր տեսչութեան Կարապետի՝ ծերացելոյ իմաստիք...»)։

ԿԻՐԱԿՈՍ—անեցի երեց, Ծախյատնի և Նուրայ Խաթունի որդին, 1342 թ. Անիում ստացել է մի Ծաշոց։ Կնոջ անունն է Գայանե։

ԿԻՐԱԿՈՍ—անեցի վարդապետ, 1348 թ. նահատակվել է մահմեդականների ձեռքով և թաղվել քաղաքի արվարձանում։

ԿՈՍՏԱՆԴԻՆ—քահանա, տոհմանունը՝ Հոռոմեանց։ Հիշվում է որդու՝ Հովհաննեսի 1213 և 1215 թթ. Արջո Առինի և Բագնայրի նվիրատվական արձանագրությունների մեջ։

ՀԱԿՈԲ—անեցի քահանա, Կիրակոսի և Խելոքի որդին, ուսանել է Արջո Առինի դպրոցում, 1298 թ. ստացել Անիի Ներքին բերդում ընդօրինակված մի Ավետարան։

ՀԱԿՈԲ—անեցի քահանա, հիշվում է որդու՝ Մխիթար Անեցու 1334 և 1338 թթ. հիշատակարաններում։ Կնոջ անունն է Սեդա։

ՀԱՄԱԶԱՍՊ—անեցի եպիսկոպոս, Հաղբատի վանահայր։ Առաջին անգամ հիշվում է 1242 թ. մի արձանագրության մեջ, 1245-ին կառուցել է վանքի հանրահայտ զանգակատունը եղբոր՝ Գրիգոր Անեցու օգնությամբ։ 1257-ին կառուցել է մի մեծ ժամատուն, եղել է մշակույթի հովանավոր։

ՀՈՎՀԱՆՆԵՍ Ա—Անիի եպիսկոպոս (որդի Աբուղամրի), հիշվում է 1298—1313 թթ.։

ՀՈՎՀԱՆՆԵՍ Բ ՈՍԿԵՓՈՐԻԿ—Անիի եպիսկոպոս, գրիչ։ Հիշվում է ԺԴ դարի վերջերին և ԺԵ դարի սկզբների մի շարք հիշատակարաններում (մինչև 1443 թ.)։

- ՀՈՎՀԱՆՆԵՍ—վարդապետ, Հոռոմոսի վանքի հիմնադիր և առաջին վանահայր (Ժ դարի 30—40-ական թթ.):
- ՀՈՎՀԱՆՆԵՍ—Հոռոմոսի վանահայր, հիշվում է Հովհաննես Սմբատ թագավորի 1038 թ. արձանագրության մեջ:
- ՀՈՎՀԱՆՆԵՍ—Հոռոմոսի վանքի միաբան, գրիչ և ծաղկող, հիշվում է 1181, 1187, 1198 թթ. հիշատակարաններում: Ավագ եղբորը՝ Վարդանին, որը նույն վանքի միաբան էր, համարում է իր ուսուցիչը, ուներ նաև աշխարհական եղբայր՝ Գրիգոր անունով:
- ՀՈՎՀԱՆՆԵՍ ՍԱՐԿԱՎԱԳ—Անիի վարդապետարանի ուսուցչապետ ԺԱ դարի 80-ական թվականներից, նշանավոր վարդապետ և մատենագիր: 1124 թվականից հետո մի կարճ ժամանակահատված սպասավորել է Անիի Մայր տաճարում (1129 թ. մահացել ու թաղվել է Հաղբատում):
- ՀՈՎՀԱՆՆԵՍ—Անիի վարդապետարանում աշակերտել է Հովհաննես Սարկավագին, եղել Սամուել Անեցու դասընկերը, որը և հիշում է նրան (ԺԱ դարի վերջ—ԺԲ դարի սկիզբ):
- ՀՈՎՀԱՆՆԵՍ—1211 թ. գրել է Սահակ Անեցու ստացած «Հաղբատի Ավետարանի» հիշատակարանը Անիում, կամ Արջո Առիճում:
- ՀՈՎՀԱՆՆԵՍ (ՄԱԳԻՍՏՐՈՍԵՆՑ)—Արջո Առիճի վանահայր, հիշվում է 1298 թ. Հակոբ Անեցու ստացած Ավետարանի հիշատակարանում:
- ՀՈՎՀԱՆՆԵՍ—քահանա, Հոռոմեանց Կոստանդին քահանայի որդին, 1213 թ. մի շարք նվիրատվություններ է կատարել Արջո Առիճի վանքին, իսկ 1215-ին՝ Բագնայրին:
- ՀՈՎՀԱՆՆԵՍ—Խժկոնքի վանահայր, հիշվում է 1211 թ. Ջաքարե ամիրսպասալարի նվիրատվական արձանագրության մեջ, ինչպես նաև 1213 և 1221 թթ. արձանագրություններում:
- ՀՈՎՀԱՆՆԵՍ—Խժկոնքի միաբան, երեց, հիշվում է 1233 թ. մի արձանագրության մեջ (այդ ժամանակ արդեն մահացած էր):
- ՀՈՎՀԱՆՆԵՍ—երեց, հիշվում է 1401 թ. մի հիշատակարանում «Անեցի» մականունով:
- ՀՈՎՀԱՆՆԵՍ ԾԱՄԲԵՑԻ—վարդապետ, 1786 թ. նորոգել է Հոռոմոսի վանքը:
- ՀՈՎՍԵՓ—Բագնայրի վանքի փակակալ, հիշվում է 1262 թ. երկու նվիրատվական արձանագրություններում («Յուսէփ փակակալ...»):
- ՀՈՎՍԵՓ—Հոռոմոսի վանահայր, հիշվում է 1269 թ. մի նվիրատվական արձանագրության մեջ («հայր Յուսէփ...»):
- ՄԱՐԳԱՐԵ—աբեղա, գրիչ, մանրանկարիչ, 1209 թ. մի ավետարան է կազմել Հառիճում, իսկ 1211 թ. Սահակ Անեցու ստացած «Հաղբատի Ավետարանը» լրացրել ու նկարազարդել է Անիի Բեխենց վանքում:
- ՄԱՐԳԱՐԵ—քահանա (միայնավոր), 1208 թ. նրա համար Խժկոնքում մահարձան-խաչքար է կանգնեցրել իր աշակերտը:
- ՄԱՐԿՈՍ—անեցի երեց, հիշվում է քաղաքի Ս. Սարգիս (Սիրի Պահլավունու) եկեղեցու մի արձանագրության մեջ:
- ՄԻՔԱՅԵԼ ՏԵՐ ՄԻՆԱՍՅԱՆ—վարդապետ (1851—1918), Անիի վերջին հոգևորականը՝ «Անիի վանահայրը»:
- ՄԽԻԹԱՐ ԱՆԵՑԻ—Անիի Կաթողիկեի փակակալ, մատենագիր և թարգմանիչ (ԺԲ—ԺԳ դ. սկիզբ):

- ՄԽԹԻԱՐ ԱՆԵՑԻ—անեցի քահանա, Հակոբ քահանայի և Սեդայի որդին, գրիչ, ծաղկող, կազմարար: Հիշվում է Սուլթանիայում իր գրած 1321, 1334, 1338, 1357 թթ. հիշատակարաններում:
- ՄԽԹԻԱՐ ԲԱԳՆԱՅՐԵՑԻ—Բագնայրի վանահայր, 1047 թ. ուղեկցել է կաթողիկոս Պետրոս Գետադարձին՝ Արծն ուղևորվելիս:
- ՄԽԹԻԱՐ ՏԵՂԵՐՑԻ—Անիի եպիսկոպոս ԺԳ դ. 70-ական թթ.:
- ՄԽԹԻԱՐ—Հոռոմոսի վանքի միաբան, հիշվում է 1181 թ. Հովհաննես գլխի հիշատակարանում:
- ՄԽԹԻԱՐ—Հոռոմոսի վանահայր (նույնը նախորդի հետ), 1198 թ. նորոգել է վանքի ջրատարը, վանական այգի է տնկել Փարպիում: Հիշվում է նաև 1201 և 1211 թթ.:
- ՄԽԹԻԱՐԻԿ—Անի կաթողիկոսարանի սպասավորներից՝ ԺԱ դ. կեսեր (Մատթեոս Ուռհայեցի):
- ՄԿՐՏԻԶ—աբեղա, որդի Ռատի, 1258 թ. իր հոգևոր եղբայր Գրիգորի հետ նորոգել է Հոռոմոսի վանքի՝ Արուճում և Փարպիում գտնվող հրձանները:
- ՄՈՎՍԵՍ—Անիի Ս. Աստվածածին (Խամբուշենց) եկեղեցու քահանա, հիշվում է 1054 թ. մի արձանագրության մեջ:
- ՆԵՐՍԵՍ—անեցի եպիսկոպոս, հիշվում է 1156 թ. Տիգրան Հոնենցի կառուցած Ս. Գրիգոր Լուսավորչի եկեղեցու արձանագրություններից մեկում, որի քարը պատկանել է ավելի հին կառույցի:
- ՆԵՐՍԵՍ—անեցի գրիչ «քարտուղար», 1357 թ. Անիում գրել է պարոն Ասիլի հիշատակարանը Ս. Առաքելոցին նվիրաբերված «Կեռան թագուհու և Հեթում արքայորդու Ավետարանում»:
- ՊԵՏՐՈՍ Ա ԳԵՏԱԴԱՐԶ—Ամենայն Հայոց կաթողիկոս 1019—1058:
- ՊԵՏՐՈՍ—երեց, 1174 թ. նվիրատվություն է կատարել Հոռոմոսի վանքին:
- ՊԵՏՐՈՍ—Հոռոմոսի վանահայր, 1195 թ. մահացած միաբանների համար մատուցվող պատարագների քանակը սահմանող արձանագրություն է թողել:
- ՊԵՏՐՈՍ—Հոռոմոսի վանահայր, վարդապետ, հիշվում է 1851 թ.:
- ՊՈՂՈՍ—Խժկոնքի վանահայր, վարդապետ, հիշվում է տեղի 1208, 1221, 1233 թթ. արձանագրություններում և 1236 թ. վանքին նվիրված մի Ավետարանի հիշատակարանում:
- ՍԱՀԱԿ—Անիի Աբուխանմի եկեղեցու քահանա, հիշվում է տեղի անթվական արձանագրություններից մեկում:
- ՍԱՀԱԿ—Անեցի քահանա, Ռիմանոսի և Կատայի որդին, ուսանել է Հաղբատում, 1211 թ. ստացել է մի մեծարժեք Ավետարան (ՄՄ. № 6288 «Հաղբատի Ավետարան»):
- ՍԱՄՈՒԵԼ ԱՆԵՑԻ—Անիի կաթողիկեի ավագերեց, մատենագիր (ԺԲ դար):
- ՍԱՐԳԻՍ Ա ՍԵՎԱՆՑԻ—Ամենայն Հայոց կաթողիկոս 992—1019 թթ.:
- ՍԱՐԳԻՍ Ա—Անիի եպիսկոպոս (որդի Ապիրատի), հիշվում է (1187-ին՝ որպես քահանա) 1208—1220 թթ.:
- ՍԱՐԳԻՍ Բ—Անիի եպիսկոպոս (որդի Մագիստրոսի), հիշվում է 1245—1262 թթ.:

ՍԱՐԳԻՍ—Հոռոմոսի վանահայր, 969 թ. մասնակցել է Անիի առաջին եկեղեցական ժողովին, հիմնադրել է Անիի մերձակա Կարմիր վանքի Ս. Գրիգոր Լուսավորչի եկեղեցին, բայց մինչև կառույցի ավարտը 980 թ. մահացել է:

ՍԱՐԳԻՍ—Հոռոմոսի վանահայր, հիշվում է Հովհաննես Սմբատ թագավորի 1036 թ. արձանագրության մեջ:

ՍԱՐԳԻՍ—Անեցի, կաթողիկոսարանի նշանավոր վարդապետ: Նամակագրական կապ է ունեցել Գրիգոր Մագիստրոսի հետ, որի ուսումնակիցն է եղել ժամանակին: Պահպանվել է Սարգսի մի ինքնագիր հիշատակարանը 1041 թ., ինչպես նաև նրա հեղինակած մի քանի գանձ:

ՍԱՐԳԻՍ—Անիի Ս. Առաքելոց եկեղեցու քահանա, հիշվում է այդ եկեղեցուն նվիրաբերված մի գրականի 1164 թ. արձանագրության մեջ:

ՍԱՐԳԻՍ—Հոռոմոսի միաբան, 1198 թ. օժանդակել է Մխիթար վանահորը վանքի ջրատարի նորոգման գործում, Հոռոմոսի համար հողակտոր է գնել Փարպիում:

ՍԱՐԳԻՍ—անեցի կուսակրոն քահանա, հիշվում է 1211 թ. Մարգարե գրչի «Հաղթանի Ավետարանում» գրած հիշատակարանում: Եղբոր անունն է Շահեր:

ՍԱՐԳԻՍ—Խժկոնքի միաբան, հիշվում է 1236 թ. վանքին ընծայված Ավետարանի հիշատակարանում:

ՍԱՐԳԻՍ—Անիի մերձակա Ծմակ գյուղի ավագերեց (որդի Գրիգոր քահանայի), 1233 թ. նվիրատվություն է կատարել Բագնայրին:

ՍԱՐԳԻՍ—սարկավագ, Անիի Կաթողիկեի սպասավոր, հիշվում է 1236 թ. Նացուալ նվիրատուի հիշատակարանում:

ՍԱՐԳԻՍ—Հոռոմոսի միաբան, վարդապետ, հիշվում է 1246 թ. արձանագրության մեջ:

ՍԱՐԳԻՍ—անեցի քահանա (որդի Եփրեմ քահանայի), որը գաղթել է Սուլթանիա: 1326 թ. հիշվում է եղբոր՝ Գրիգոր քահանայի ստացած ձեռագրի հիշատակարանում (Երուսաղեմ № 453):

ՍԱՐԳԻՍ—Անիի մերձակա Կարմիր վանքի վանահայր, հիշվում է 1274 թ.

ՍԱՐԳԻՍ—կրոնավոր, Հոռոմոսի միաբան, հիշվում է 1347 թ. վանքին նվիրաբերված արձաթակագն Ավետարանի կազմի դրվագագիր հիշատակագրության մեջ:

ՍԱՐԳԻՍ—անեցի երեց, քաղաքի Ս. Սատվածածին (Խամբուշենց) եկեղեցու սպասավոր: Հիշվում է ոմն Արքայի անթվական արձանագրության մեջ:

ՍԱՐԳԻՍ—անեցի քահանա, հիշվում է քաղաքի Ս. Սարգիս (Սարկավագի) եկեղեցու մի անթվական արձանագրության մեջ: Կնոջ անունն է Գոհար խաթուն:

ՍԱՐԳԻՍ—վարդապետ: Անունն արձանագրված է Անիի Ս. Սարգիս (Սարկավագի) եկեղեցու որմին:

ՍԱՐԿԱՎԱԳ—անեցի քահանա (հավանորեն Սամուել Անեցու որդին), 1151 թ. հիմնովին նորոգել է քաղաքի Ս. Սարգիս (Սարկավագի) եկեղեցին:

ՍԱՐԿԱՎԱԳ—անեցի քահանա, 1292 թ. քաղաքում մի ձեռագրի օրինակ է շնորհել Երզնկայից այստեղ ապաստանած Ահարոն վարդապետին:

ՍԱՐԿԱՎԱԳ—Անիի Կաթողիկեի ավագերեց, հիշվում է 1286 թ. մի նվիրատվական արձանագրության մեջ:

ՍԻՄԵՈՆ—անեցի քահանա, հիշվում է ԺԳ դարի սկզբին Բեխենց վանքում գրված ձեռագրի հիշատակարանում, որպես միջնորդ գնորդ-ստացողի և տեղի գրչատան միջև:

ՍԻՄԵՈՆ (Մարնդունեցի)—անեցի հոգևորական՝ մենակյաց, 1292 թ. օգնություն է ցուցաբերել Երզնկայից Անի եկած Ահարոն վարդապետին և հիշվում է վերջինիս գրած հիշատակարանում:

ՍԻՄԵՈՆ—Հոռոմոսի վանքի փակակալ, հիշվում է 1269 թ. մի նվիրատվական արձանագրության մեջ:

ՍԻՄԵՎՈՆ—Բագնայրի վանահայր, վարդապետ: Հիշվում է վանքի 1206, 1209, 1229, 1233, 1234 թթ. արձանագրություններում և «Բագնայրի Ավետարանի» (ՄՄ № 1519) 1232 թ. հիշատակարանում:

ՍՈՂՈՄՈՆ—Հոռոմոսի վանահայր, հիշվում է վանքի 986 թ. մի նվիրատվական արձանագրության մեջ, ինչպես նաև Անիի մերձակա Կարմիր վանքի 985 թ. շինարարական արձանագրության մեջ, որից երևում է, որ հենց նա է այդ վանքի շինարարությունն ավարտել:

ՍՏԵՓԱՆՈՍ ԱՍՈՂԻԿ—վարդապետ, պատմագիր, որը սերտորեն կապված էր Անիի կաթողիկոսարանի հետ (Ժ դարի վերջ ԺԱ դարի սկիզբ):

ՍՏԵՓԱՆՈՍ—Բագնայրի վանահայր, հիշվում է 1042 թ. մի արձանագրության մեջ:

ՍՏԵՓԱՆՈՍ—քահանա, Անիի կաթողիկոսարանի սպասավոր, հիշվում է Գրիգոր Մագիստրոսի՝ Պետրոս Գետադարձին հղած նամակներից մեկում:

ՍՏԵՓԱՆՈՍ—անեցի քահանա, Կիրակոսի և Խելոքի որդին, հիշվում է 1298 թ. եղբոր՝ Հակոբի ստացած Ավետարանի հիշատակարանում:

ՍՏԵՓԱՆՈՍ—գրիչ (ուղի Գելանի), 1308 թ. հիշատակարան է գրել «Բագնայրի Ավետարանում»:

ՍՏԵՓԱՆՈՍ—Հոռոմոսի վանահայր, հիշվում է 1336 թ. արձանագրության և 1347 թ. վանքին նվիրաբերված Ավետարանի կազմի հիշատակագրության մեջ:

ՎԱՀԱՆ—Հոռոմոսի վանահայր, հիշվում է 1326 թ. արձանագրության մեջ:

ՎԱՆԱԿԱՆ—Անիի Բեխենց վանքի միաբան, ԺԳ դարի սկզբներին կազմել է մի Ավետարան (ՄՄ № 5554):

ՎԱՐԴԱՆ—Անիի եպիսկոպոս, մասնակցել է 1307 թ. Սսի ժողովին, հիշվում է նաև 1320 թ. Մդենի մի արձանագրության մեջ:

ՎԱՐԴԱՆ ԱՆԵՑԻ—վարդապետ, բանաստեղծ: Հեղինակ է մի բարձրարվեստ ներբողի (հավանաբար Ժ—ԺԱ դդ.):

ՎԱՐԴԱՆ ՍԱՆԱՀՆԵՑԻ—Անիի կաթողիկոսարանի սպասավոր ԺԱ դ. առաջին կեսին (Մատթեոս Ոռհայեցի):

ՎԱՐԴԱՆ—Հոռոմոսի միաբան (միայնավոր), հիշվում է 1181 և 1187 թթ. կրտսեր եղբոր՝ Հովհաննեսի գրած հիշատակարաններում (վերջինիս ուսուցիչն էր):

ՎԱՐԴԱՆ—Արջո Առինի վանահայր, հիշվում է ոմն Առյուծի և նրա կիմ Շուշիկի անթվական նվիրատվական արձանագրության տեջ:

ՎԱՐԴԱՆ—վարդապետ, Հոռոմոսում նորոգման աշխատանքներ է կատարել 1825 թ.:

ՏԻՐԱՆՈՒՆ—Անիի կթողիկոսարանի վարդապետ ԺԱ դ. սկզբներին: Մատթեոս Ուռհայեցին նրան կոչում է «իմաստասէր Տիրանուն Կապանեցի»:

ՏԻՐԱՅՈՒ—Անիի Բեխենց վանքի միաբան, գրիչ, ծաղկող: ԺԳ դ. սկզբներին մասնակցել է մի Ավետարանի ստեղծման աշխատանքին (ՄՄ № 5554), ենթադրվում է, որ նա է ընդօրինակել նաև «Թարգմանչաց Ավետարանը» (ՄՄ 2743):

ՏՐԴԱՏ—անեցի քահանա (որդի Սոսթենես քահանայի), 1193 թ. կնոջ՝ Խուշուշի հետ նորոգել է Անիի Ա. Փրկչի եկեղեցին, կառուցել ժամատուն և բազմաթիվ նվիրատվություններ կատարել:

ՔԱՀԱՆԱ—Անեցի հոգևորական, հիշվում է 1307 թ. Անիի Ներքին Բերդի Ա. Հովհաննես եկեղեցու պատին թողած արձանագրության մեջ:

ՔՐԻՍՏԱՓՈՐ—Բագնայրի միաբան (վանահայր^ը), հիշվում է ԺԳ դարի մի անթվական արձանագրության մեջ:

ԿԱՐԵՆ ՄԱԹԵՎՈՍՅԱՆ

